



**Komunikadu Imprensa**  
**Periódú 16 Janeiru 2017**

**Estudante Laicara primeira-vez simu treinamentu kona-ba papel jenéru no kazu krime sira ho natureza seksuál relevantes sira iha lei penal aplikável**

Iha 12 Janeiru 2017, JSMP hala'ó treinamentu ba estudante Ensinu Báziku (EB) 1, 2, 3 de Laicara, Suku Maina II, Sub-distritu Lautem, Distritu Lautem kona-ba asesu ba justisa formal no direitu labarik.

Treinamentu ne'e partisipa hosi estudante hosi klase 7, 8, no 9 (ensinu pre-sekundáriu klase 1, 2, no 3) ho total estudante hamutuk ema nain 30 kompostu hosi feto nain 20 no mane nain 10.

Treinamentu ne'e ho objetivu atu hasa'e koñesimentu estudante sira nian kona-ba direitu labarik no direitu feto, konseitu jeral kona-ba Lei Kontra Violénsia Doméstika, violasaun seksuál no abuzu seksuál ba menór inklui asesu ba justisa formal.

“Treinamentu ne'e nu'udar forma ida atu intrudus provizaun relevante sira iha enkuadramentu kriminal aplikavel ba labarik sira relasiona ho krime sira ne'ebé durante ne'e akontese iha Timor-Leste, liu-liu krime sira ne'ebé afeita ba labarik sira hanesan abuzu seksuál ba menor. Idane'e nu'udar meu ida atu kontribui ba prevensaun ba krime ne'e iha futuro, tanba labarik barak teb-tebes mak sai vítima ba krime hirak ne'e, dehan Luis de Oliveira Sampaio, Diretór Ezekutivu JSMP.

Reprezentante Diretór EB 1, 2, 3 Laicara Sr. Alberto Correia, iha ninia abertura, expresa nia agradesementu ba JSMP nia prezensa tanba desde eskola ne'e hari'i too agora, seidak iha organizasaun ida fó treinamentu kona-ba asuntu hirak ne'e ba iha estudante sira.

Durante treinamentu, estudante sira hatudu sira nia vontade no antusiasmu hodi rona esplikaun kona-ba konseitu igualidade jéneru, abuzu seksuál ba menor, violasaun seksuál no prosidimentu legal sira relasiona ho krime hirak ne'e.

Estudante sira konsidera katak treinamentu ne'e importante duni tanba durante ne'e sira la iha koñesimentu kona-ba feto ho mane ne'ebé iha direitu hanesan, natureza krime abuzu seksuál no violasaun seksuál no saida maka tenke halo bainhira krime ruma akontese ba sira ka sira nia família ka kolega sira. Estudante sira haktuir katak durante ne'e dalabarak sira hasoru no asiste

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77295795

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

hela krime hirak ne'e maibe tanba falta deit informasaun no koñesimentu, sira rasik lakonsege ajuda sira nia an ka sira nia família ne'ebé hasoru hela problema hirak. Tanba ne'e partisipante sira sente treinamentu ne'e nu'udar oportunidade diak ba sira atu aprende referénsia foun ne'ebé sira la bele hetan hosi prosesu aprendizajem ensinu formal.

Iha sesaun enseramentu, representante Ensinu Baziku 1, 2, 3 Laicara, husu ba JSMP atu bele fó treinamentu ne'ebé foku ba iha profesor sira atu bele transfere ba iha alunu sira, hodi bele efetivu liutan.

Treinamentu ne'e realiza tanba apoiu finanseiru hosi Embaixada Canada, Jakarta-Indonézia.

Atu hetan informasaun kle'an liu tan favór kontaktu:

Luis de Oliveira Sampaio  
Diretór Ezekutivu JSMP  
[info@jsmp.minihub.org](mailto:info@jsmp.minihub.org)